

編號 3 號

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該載堵好係梅雨季節，落過雨、起風也，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩天弓，還鼻得著打馬膠路¹分日頭花煎過、分雨水打過以後淡淡、香香个味緒，臨暗頭窗門外背一陣一陣「揸、揸、揸！揸、揸、揸！」个蟬仔聲順等清風傳入屋肚來。

恁起還細時節，熱燂燂个下晝頭，恁恁多姊妹會摻隔壁鄰舍个細人伴仔共下搞，輒常搞到斷烏，聽著阿姆開聲喊：「好轉來洗手食飯咧！」正盼得轉屋。

吾爸係客運司機，平常時愛輪班，故所總係暗晡頭八、九點正下班。當記得係堵好該日無伸麼个飯菜，吾爸會自家煮麵食。逐擺佢就摻蒜頭礮礮啊、再剝到幼幼，泚一息仔豆油還過香油，先放在碗公肚，續等摻煮好个麵撈起來，水泌界燥，再同麵倒到碗公，摻麵同蒜頭、配頭攪界勻，該央時係聽著吾爸問：「有麼

人愛食麵無？」恁這兜就盡暢，遽遽飄入灶下，你一口、恁一口，又賺著一餐香噴噴个大麵點心，食到飽飽仔，還幸福哪！吾爸同伸个飯菜間等伸無幾多條个大麵，儘採划落肚，就恁樣過一餐。

又還記得，熱天臨暗頭洗好身腳，等到食飽夜，碗筷撿掣，寫好作業，看一下電視，細人仔還細又好搞，差毋多到愛上眠床該下，又一身汗也；毋過，頭擺屋下無恁好額，淨有一隻間房安有冷氣定定。阿姆會提早半點鐘摻冷氣掣開來，等大家愛睡目該下，間房門打啊開來，涼沁沁个冷氣，還有阿姆拿去晟過日頭个被骨，散出香香个日烈味緒，歸屋下人尖在兩頂眠床頂，黏時就睡落覺咧。

這幸福个滋味一直園在吾心肝頭，毋多知仔成人長大、做人阿姆以後，正知「賺錢可比針挑笏，使錢可比水推沙。」正體會著爺哀頭擺辛苦畜大恁這兜恁多个細人仔、愛理一個家哪有恁該？毋過該愛盡个責任摻義務，佢兜從來都毋識放忒過。

¹ 打馬膠路：音 da`ma`gau`lu；柏油路。